

■ CONVIVENZA

Stoda bunas intenziuns

DA VIOLA PFEIFFER*

Jau hai sin mes i-phone ina glista cun bunas intenziuns. Ditg era questa glista vaira survesaivla. Là stevan chaussas sco «esser gentila cun mes frar», «betg sdiavlar trasora», «s'annunziar dapli tar mes parents». Piculezzas per esser ina meglra persuna. Ma ils davos onns ha questa glista survegnì ina lunghezza incredibile. I n'è betg uschia che jau fiss vegnida mendra, ma insaco hai jau il sentiment ch'i dettia tuttenina dapli chaussas ch'ins duess far per esser in bun uman: betg mangiar charn, tegnair urden, cumprar fairtrade u mo products da la regiun, far sport, betg chaschunar memia bler rument. Ma il problem n'è betg mo la dimensiun exorbitanta da mia glista, mabain era che las intenziuns cumenzan a sa cuntradir.

Ins na duess per exempel betg mangiar charn, e sche bain, lura mo charn da la regiun. Ma il medem mument na duess ins era betg mangiar ovs, betg bai-ver latg ed era betg mangiar peschs – ed er avocados u products da soja n'èn betg pli lubids. Per la produziun d'avocados vegnan runcads entirs gauds selvadis en l'America dal sid, la produziun da latg è tuttina nunecologica sco la produziun da charn e per ils champs da soja vegn duvrà uschè bler tissi ch'ìls purs en Brasilia vegnan malsauens e lur uffants naschan cun impediments. Da giagliners sco fabricas na stoss jau gnanc scriver – ovs stuessan atgnamain custar tschintg francs il toc per che las giaglinas hajan ina bella vita.

Ina stoda chaussa èsi era cun la vestgadira. Ins vuless gea vesair ora bain. Ma



ins na duess betg cumprar vestgadira ch'è producida en l'Asia, nua che las cusunzas moran da la fom. Comprer tar H&M e cumpagnia n'è pia betg in'opziun. Ma en vestgadira da fairtrade ves'ins per il solit ora sco la scolasta da lavurs a maun che candidescha per la ps en il vitg vischin. Sch'ins vul vesair ora bain en vestgadira da fairtrade ston ins cumprar tar ils designers total hips en las boutiques zupadas a Turitg en il circol 5 ed esser pront da pajar summas enormas – u gist ir en Germania. Ma lura ston ins prender l'eroplan (nunecologic) u il tren (chareschia).

Er far sport tutga tar Emintga bun uman che vul restar saun. Ma per currer dovrel jau natiralmain ils novs chalzers da Nike. Ed in pèr leggings ed ina giacca da North Face, sch'i plova. E lura dovrel jau anc uschè in etui per metter en il telefonin cura che jau cur. Per fortuna poss jau empustar tut quai sin Zalando. Ma stop! Gliez na dastg jau gea era betg – il rument che quai chaschuna! E sovivo n'è quai gea betg fairtrade!

Elura vuless jau daditg ina giada far urden en mias stgaffas. Smanar davent tut il plunder che jau na dovrel betg – tenor la metoda da la Giapunaisa

Marie Kondo. Quai deliberescha! Ma stop! Tge èsi cun la nova filosofia da «zero waste»? Ins duess gea bittar davent uschè pauc sco pussaivel, uschiglio sfundra il mund entaifer ils proxims 50 onns en noss rument. I dat ina dunna che producescha entaifer in onn mo in satget plain rument! Tge exempel! Bittar davent chaussas n'è pia era nagina opziun.


Stoda bunas intenziuns! Jau avess uschè gust dad ir en il Steakhouse, vuless exnum empustar ina super-coola nova giacca da tgirom tar Zalando e trametter in nausch sms a mes fratelli. Talas chaussas fan simplamain bain mintgatant. Exact, quai fiss bain ina buna nova intenziun per mia glista. Far mintgatant insatge che fa simplamain mo bain.

* Viola Pfeiffer studegia germanistica, istorgia e rumantsch a l'Universitad da Turitg. Mintgatant lavura ella per la «Südostschweiz», mintgatant per il «teletext» e mintgatant sco scolasta, ma bunamain adina scriva ella.

Vocabulari

stoda – verflix
 glista – Liste
 sdiavlar – fluchen
 mangiar charn – Fleisch essen
 rument – Müll, Abfall
 cuntradir – widersprechen
 runcar – roden
 gaud selvadi – Urwald
 tissi – Gift
 nescher – geboren werden
 giagliner – Hühnerstall
 vestgadira – Kleider
 cusunza – Näherin
 murir da la fom – vor Hunger sterben
 per il solit – meistens
 lavurs a maun – Handarbeit
 ps – SP
 eroplan – Flugzeug
 chalzers – Schuhe
 empustar – bestellen
 stgaffa – Schrank
 sfundrar – versinken
 bittar davent – wegwerfen
 giacca da tgirom – Lederjacke

Unterstützt von der
Lia Rumantscha



Lia Rumantscha